

ILUARSIISSUT

Isumaliutissiissut 15. november 2019 ullulerneqartoq taarserpaa

(Isumaliutissiissummi siullermi takuneqarsinnaanngilaq qinnuteqarnissamut periarfissat tamakkiisumik atorneqarneq ajornerat ataatsimiititaliamillu tamanna ajuusaarnartutut isigineqartoq. Tamanna naqqiissummi uani iluarsineqarpoq.)

Uunga siunnersuut: Inissianik aningaasalersuisarneq pillugu Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxx 2019-imeersoq

(Inissialiortiternermut tapiissutitalimmik illulianik iluarsaassinermut, pitsannngorsaanermut alliliinermullu taarsigassarsititsisarneq tapiissuteqartarnerlu)

pillugu**Ineqarnermut Attaveqaatigiinnermullu Naalackersuisup****siunnersuutip aappassaaniigassanngortinneqarneranut****ISUMALIUTISSIISSUTAA**

Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Anders Olsen, Siumut, siulittaasoq
Inatsisartunut ilaasortaq Aqqaluq B. Egede, Inuit Ataqtigiit, siulittaasup tullia
Inatsisartunut ilaasortaq Nikkulaat Jeremisassen, Siumut
Inatsisartunut ilaasortaq Justus Hansen, Demokraatit
Inatsisartunut ilaasortaq Pele Broberg, Partii Naleraq

UKA 2019-mi Ulloq 3. oktober 2019 siullermeerinninnerup kingorna siunnersuut ataatsimiititaliamit misissorneqarpoq.

Siunnersuutip imarisaa siunertaalu

Inatsisissatut siunnersuut inissianik nutarsaanermut ilaavoq, tassani Naalackersuisut inissianik aningaasalersuisarnerup 1. januar, 2020-mi kommuninut tunniutilersaarmassuk. Inatsisissatut siunnersuummi tapersiissutitalimmik inissialiortiternermut taarsigassarsitinneqarsimasunut aamma inissianut maanna piginnittuusut taarsigassarsisoralugit inissianut tapersiissutitalimmik taarsigassarsiaqarfiusimasunut aalajangersakkat nutaat ilanngunneqassapput. Tapiissutinik qinnuteqartut inoqtigiit ukiumut akileraarfiusumut isertitaat 180.000 koruunit inorlugit

isertitaqarsimappata tapiissutit annerpaamik 150.000 koruuniusinnaapput. Aammattaaq aalajangersakkamik nutaamik ilanngussisoqarpoq, taanna malillugu inissiat sumiiffinni nalinginnaasumik aningaaserivimmi imaluunniit realkredit-imi inissiamik qularnaveeqqusiilluni taarsigassarsiviusinnaasumiittut inissiap iluarsaannissaannut tapiiffigineqarsinnaassanngillat.

Siunnersuut tapersiissutitalimmik inissialiortiternermut taarsigassarsititsisarneq pillugu Inatsisartut inatsisissaattut siunnersuummut, Kalaallit Nunaanni Namminersorlutik Oqartussat inissianik aningaasalersuisarneq pillugu Inatsisartut inatsisaat malillugu aamma iluarsaassinissamut alliliinissamut pitsanngorsaaneremullu tapiissuteqartoqarsinnaanissaa maannakkut piginnittuusut taarsigassarsisorlugit inissianut tapersiissutitalimmik taarsigassarsiaqarfiusimasunut inatsisitigut tunngavissanut atasutut isigineqassaaq.

Siunnersuutip inatsisartuni siullermeerlugu suliarineqarnera

Siullermeerinninnermi Ineqarnermut Attaveqatigiinnermullu Naalackersuisumit oqaatigineqarpoq ukioq 2017-mi konto pingaarnermut 87.72.23-mut, Tapersiissutitalimmik inissialiortiternermut taarsigassarsititsisarneq, inissianut iluarsaassinissannut tapiissutit 10.000.000 koruuninik aningaasaliisoqarsimasoq. Taakkunannga 9.000.000 koruunit atorineqarsimapput. Taamatuttaaq 2018-mi 10.000.000-nik kontomut pingaarnermut aningaasaliisoqarsimavoq, taakkunannga 1.000.000 koruunit missaanniittut atorineqarsimallutik. Ineqarnermut Attaveqatigiinnermullu Naalackersuisup oqaatigaa, qinnuteqarnissamut periarfissaq pillugu paasititsiniaaneq amigaataasoq. Aningaasat tamarmik atorineqartannginnerat ataatsimiititaliamit ajuusaarnartutut isigineqarpoq. Ataatsimiititaliilli paasinninnera malillugu, suliassaq inatsitsigullu tunngavissat kommunitut nuunneqartussaammata taarsigassarsinissamut tapiiffigineqarnissamullu periarfissat innuttaasunit tikikkumarnerulissapput. Aammattaaq suliassat ingerlanneqartarnerat piffinnut qanillisussaapput. Qinnuteqarnissamut periarfissat pillugit paasititsiniaaneq qanoq ililluni qulakkeerneqarnissaa kommunit akisussaaffigisariaqarpat. Ataatsimiititaliilli ernumanartoqartippaa, kommunit aningaasat inissianut aningaasalersuisarnissamut pisussaaffeqanngimmata, tamannalu qinnuteqarnissamut periarfissat pillugit paasitsiniaalluni iliutsinut ingerlanneqarsinnaasunut sunniuteqarsinnaavoq.

Tusarniaanermut akissutit

Tusarniaanermut akissutit inatsisissatut siunnersuummut uunga ilanngunneqarput, tamanna Inatsisartut Siulittaasoqarfiata ilusissatut piumasaqaataanut naapertuuppoq. Tusarniaanermut akissutit kalaallisut qallunaatullu ilanngunneqarsimanngitsut ataatsimiititaliap maluginiarpa. Ataatsimiititaliap Naalackersuisunut eqqaasitsissutigissavaa, Inatsisartut Siulittaasoqarfiata

ilusissatut piumasaqaatit aalajangersagaani tusarniaanermut akissutit kalaallisut qallunaatullu pissarsiassaanissaat piumasaqaataamat inatsisissamullu siunnersuummut Inatsisartuni suliarineqarnissaanut ilanngunneqartussaammata.

Ataatsimiititaliap pingaartut naqissusissallugu isigaa isumaliutissiisummut inisianik aningaasalersuisarneq pillugu tusarniaanermut akissuteqartunit kommuninit tiguneqarnissaa ernumanartutut isigineqarsimannginnera. Tamanna tunngavigalugu kommunit suliassamik kivitsisinnaanissamat pisinnaasutut isigineqarneratut nalilerneqartariaqartoq ataatsimiititaliap isumaqarpoq.

Aammattaaq ataatsimiititaliap Inunnik Isumaginninnermut Inatsisinillu Atortitsinermut Naalackersuisoqarfiup maluginiaqqullugu oqaatigissavaa aalajangersakkatigut aningaasanik atuinissamat kommunit pisussaaffilerneqanngimmata apeqqusernartimmagu. Taamaaliornikkut aningaasat allanut atussallugit kommunit qinersinnaavaat. Ataatsimiititaliap tassunga atatillugu kommuninut kaammattuutigissavaa qinnuteqarnissamat periarfissanik paasititsiniaaqullugit taamaaliornikkut aningaasat siunertamat naapertuuttumik atorneqarniassammata.

Ataatsimiititaliap siunnersuummik suliarinninnera

Ataatsimiititaliap aallarniutigalugu kissaatigaa Inatsisissatut siunnersuummut uunga aamma nunatsinni innuttaasut aningaaserivimmi imaluunniit realkredit-imi inissiamik qularnaveeqqusiilluni inissiap iluarsaannissaanut tapiiffigineqarsinnaanngitsunut inissianik aningaasalersuisarnermik ataatsimut katersorneqarnissaannik siunertaa tapersermagu. Tapiiffigineqarnissamat periarfissap kommuninut nuunneqarnerani qulakkeerneqassaaq sullissinerup innuttaasunut suliallu ingerlanneqarfiinut qaninnerulernissaat.

Ataatsimiititaliap aallarniutigalugu tapiissutit qaffasissusissaat aamma tapiissutit 150.000 koruuninut annertunerpaaffissalernerneqarnerat naapertuuttutut isumaqarfigaa. Tapiissutinik qinnuteqartut inoqutigiit ukiumut akileraarfiusumi isertitaat 180.000 koruunit inorlugit isertitaqarsimanissaannik suli aalajangersarneqarluni qinnuteqarsinnaasunut killiliussaq atuuttussaavoq. Taamaaliornikkut qulakkeerneqassaaq isertitakitsut tapiiffigineqarnissamat periarfissaqarnissaat.

Tapiiffigitinnissamat qinnuteqartussat qanoq amerlatiginissaat eqqoriassallugu Ataatsimiititaliap ajornakusoortippaa.

Ukioq 2016-mi Nunatsinni Kisitseqqissaartarfiup Isertitat, atuneq akillu pillugit kisitsisit aallaavigalugit ataatsimiititaliap annertunerpaaffissalernerneqarneranut killiliussat naapertuuttut isigai. Tassani takuneqarsinnaavoq, ukioq 2015-mi innuttaasut ukiumut 200.000 koruunit

tungaannut isertitaqarsimasut 25.136-iusimasut. Aammattaaq 2015-mi illoqarfinni nunaqarfinnilu inuit ataasiakkaat isertitaat tamarmiusut agguaqatigiissinnerat amerlasuutigut ukiumut 100.000 - 200.000 koruunillu missaaniissimasut. 180.000 koruuninut killigitinneqartoq qaffanneqassappat, innuttaasut qinnuteqartut 180.000 koruunit ataallugit isertitaqartut periarfissaat killilersorneqalissaaq. Taakkua innutaasunut aningaasatigut atugarissaarnerusunut unammillertutut inissinneqassapput.

Inaarutaasumik ataatsimiititaliap siunnersuutip siullermeerneqarnera innersuussutigissavaa, tassani Ineqarnermut Attaveqatigiinnermullu Naalakkersuisup aningaasat tapiissutitut qinnuteqaatigineqarsinnaasut amerlasuutigut atorneqarneq ajortut ilisimatitsissutigimmagu. Tamanna tunngavigalugu isumaqarnarpoq qinnuteqarnissamut periarfissat tamakkiisumik atorneqarneq ajortut tamannalu ataatsimiititaliap ajuusarnartutut isigaat.

Naggataatigut oqaatigineqassaaq, ataatsimiititaliap paasinninnera malillugu, qinnuteqartunut nalilersuinerminni kommunit annertuumik oqartussaaffilerneqarmata. Takuneqarsinnaavoq, § 24 b, imm. 3 malillugu, kommunit isumagissagaat iluarsaassinissap annertussusissaa, alliliinerup pitsanngorsaanerulluunniit qinnuteqartup pigisaanut nalilinnut aammalu nammineerluni suliaqarnissamut piginnaaneqarneranut sanilliunneqarnissaa kiisalu inissiap pisoqaassusissaa niuerutigineqarnermilu nalinga. Nalilersuisarnerup qanoq ingerlanneqarnissaa aningaasaliisoqartarnissaalu kommunip nammineq aalajangigassaraa. Oqartussaaffilli § 24 b, imm. 4-mi annikillilerneqarsinnaavoq, taamaaliornikkut Naalakkersuisut inissiamik iluarsaassinermut, pitsanngorsaanerumut alliliinermulluunniit maleruagassiorsinnaapput, taakkunungalu aqutsineq, aningaasat tunniunneqarnerat suliaassallu tapiiffigineqarsinnaatitaasut ilaatinneqarput. Ataatsimiititaliap Naalakkersuisunut kaammattuutigissavaa kommuninit sullinneqarnermik assigiissaarisooqarnissaa qulakkeerniarlugu piaarnerpaamik malittarisassanik aalajangersaaqullugit.

Siunnersuutip aningaasatigut kingunerisassai

Siunnersuutip piviusunngortinneqarnissaanut aningaasatigut kingunerisassai siunnersuummut nassuiaatini allaaserineqarput. Tassani allaqqavoq, konto pingarneq 87.72.23, Tapersiissutitalimmik inissialiortiternermut taarsigassarsisitsisarneq, ukiunut 2020-2022-mullu missingersuusiorfiusunut iluarsaassinernut tapiissutit kommuninut nuunniarneqartut. Kommuninut agguaassinissaq Namminersorlutik Oqartussat kommuninut ataatsimoorussamik tapiissutit pillugit isumaqatiginninniarnerinut ilaatinneqassaaq.

Inaarutaasumik ataatsimiititaliap kissaatigaa oqaatigissallugu Naalakkersuisut tungaanniit immikkoortumut tapersiissutitalimmik inissialiortiternermut tapiissutissanik aningaasalersuinissaq 2022-ip kingorna qanoq qulakkeerneqassanersoq oqaatigineqarsimanngimmat ernumanartutut isigalugu. Taamaalilluni kommunit, aningaasartuuteqarnerusussanngortinneqarsinnaapput.

Taamaammat Ataatsimiititaliap siunissaq pillugu taakkununga tunngasunik qanoq Naalackersuisut naatsorsuuteqarnerminnik ilisimatitsissuteqarnissaannik qinnuigissavai.

Ataatsimiititaliap inassutigaa

Ataatsimiititaliap isumaqatigiittup inatsisissatut siunnersuutip akuerissutigineqarnissaa inassutigaa.

Taamatut oqaaseqarluni siunnersuummilu allassimasutut paasinnilluni matumuuna
ataatsimiititaliap siunnersuut aappassaaniigassanngortippaa.

Anders Olsen
Siulittaasoq

Aqqaluaq B. Egede
Siulittaasup tullia

Nikkulaat Jeremiassen

Justus Hansen

Pele Broberg